

# CENTRALNA BANKA BOSNE I HERCEGOVINE

Na osnovu člana 2. stava 3. tačke h., člana 7. tačke e., člana 39. i člana 42. Zakona o Centralnoj banci Bosne i Hercegovine ("Službeni glasnik BiH", broj 1/97) i Odluke Predsjedništva Bosne i Hercegovine od 8. decembra 1999. godine o dizajnu kovanog novca, Upravno vijeće Centralne banke Bosne i Hercegovine na 11. sjednici od 23. i 28. juna 2000. godine, donosi

## O D L U K U

### o izdavanju, osnovnim obilježjima i puštanju u opticaj kovanog novca od 1 i 2 Konvertibilne marke

1. Centralna banka Bosne i Hercegovine (u daljem tekstu: Centralna banka) izdat će kovani novac u apoenima od 1 i 2 Konvertibilne marke (u daljem tekstu: KM), kao zakonito sredstvo gotovinskog plaćanja u Bosni i Hercegovini.

2. Kovani novac od 1 KM izrađivat će se od legure čelika presvučene niklom, a od 2 KM u dvometalu: unutrašnji prsten bakar-nikl, a vanjski prsten 5,5 % nikl-legura bakra i cinka (brass).

3. Apoeni kovanog novca iz tačke 1. ove odluke bit će okruglog oblika i imat će slijedeće tehničke karakteristike:

1) apoen od 1 KM – masu 4,90 grama, prečnik 23,25 milimetra i nazubljeno glatku ivicu prosječne debljine 1,80 milimetara sa prosječnim odstupanjem +/- 0,1 milimetar;

2) apoen od 2 KM – masu 6,90 grama, prečnik 25,75 milimetara i nazubljeno glatku ivicu prosječne debljine 2,03 milimetra sa prosječnim odstupanjem +/- 0,1 milimetar;

4. Izgled s lica apoena kovanog novca iz tačke 1. ove odluke je slijedeći:

U sredini je brojčana oznaka vrijednosti, a ispod brojčane oznake vrijednosti nalazi se slovna oznaka "KM".

Oko brojčane oznake vrijednosti ispisan je naziv "Bosna i Hercegovina" i to kod apoena od 1 KM desno od brojčane oznake vrijednosti naziv "Bosna i Hercegovina" latiničnim, a lijevo ćirilničnim pismom, a kod apoena od 2 KM naziv "Bosna i Hercegovina" ispisan je unutar vanjskog prstena i to desno od brojčane oznake vrijednosti ćirilničnim, a lijevo latiničnim pismom koji su razdvojeni kod apoena od 1 KM jednim, a kod apoena od 2 KM sa dva trokuta.

5. Izgled s naličja apoena kovanog novca iz tačke 1. ove odluke je slijedeći:

1) kod apoena od 1 KM u sredini je grb Bosne i Hercegovine, a ispod grba nalazi se brojčana oznaka "2000".

Oko grba, s desne i s lijeve strane, nalazi se ukrasna šara koja je razdvojena jednim trokutom.

2) kod apoena od 2 KM u sredini je golub sa grančicom masline u kljunu, a desno od goluba nalazi se brojčana oznaka "2000".

Unutar vanjskog prstena, ispisane su riječi "golub mira" i to desno od goluba riječi "golub mira" ćirilničnim, a lijevo latiničnim pismom koji su razdvojeni sa dva trokuta.

6. Datum stavljanja kovanog novca iz tačke 1. ove odluke u opticaj odredit će i objavit guverner Centralne banke.

7. Ova odluka stupa na snagu danom objavljivanja u "Službenom glasniku BiH", a objavit će se i u "Službenim novinama Federacije BiH" i "Službenom glasniku Republike Srpske".

UV broj: 12 /00  
23. i 28. juna 2000. godine  
Sarajevo

Predsjedavajući  
Upravnog vijeća Centralne banke  
Bosne i Hercegovine  
G U V E R N E R  
Peter Nicholl